


CELEBRACIÓN EN OS COTOS (na igrexa)

8-9 de outubro do 2022

XXVIII ORDINARIO C



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1

1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 *nº 4 Amigos nas penas*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Queremos hoxe ser unha comunidade agradecida por podermos compartir a fe.

O certo é que hoxe en día non se estila ser agradecidos, e nin sequera se leva moito ser educados e respectuosos con todo e con todos.

No evanxeo veremos como un samaritano curado por Xesús xunto con outros nove xudeus, é o único que volveu para darlle as grazas polo que fixera con el. Xesús sorpréndese que soamente un estranxeiro fora o agradecido. Os outros nin sequera se achegaron para dar as grazas, e tamén foran curados.

A Eucaristía é acción de grazas. Aproveitémola nós hoxe para agradecer a Deus tantas cousas como nos dá cada día. Grazas Pai.

E grazas irmáns por saber agradecer con nós a vida da fe e de amor que Xesús nos mostrou.

2

ACTO PENITENCIAL

Celebrante: *Pidamos perdón polas veces que non somos capaces de valorar todo o que de bo ten a nosa vida. Pidamos tamén perdón polas veces que non somos capaces de valorar o que de bo fan os demais con nós, que non é pouco. Pidamos perdón:*

Monitor/a

- ✓ Perdón Señor polas veces que non agradecemos o moito e ben que os demais nos fan. Señor perdóanos
- ✓ Perdón Señor polas veces que non consideramos á muller na igualdade sen darnos conta que é o sustento e o nexo de unión das persoas. Cristo perdóanos
- ✓ Perdón Señor polas veces que non melloramos este mundo no que vivimos, e empeorámolo cos nosos egoísmos. Espírito Santo perdóanos

Celebrante: *Deus todopoderoso teña piedade de nós e dos que teñen un lugar nos nosos corazóns e nas nosas vidas, alentándonos para sermos respectuosos e agradecidos. A todos nos conceda Deus o perdón dos pecados e por Cristo Resucitado nos leve á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración presentándolle a Deus o que nos preocupa e rebule no noso interior. Temos presente a cantos hoxe son marxidados e desprezados pola súa raza, cor, procedencia, sexo ou relixión.*

(Silenzo)

Celebrante:

Deus, noso Pai,
que a túa graza tome a iniciativa na nosa vida
e nos acompañe sempre.

Que nos faga solícitos e constantes
na práctica do ben.

Pedímoscho por Xesucristo,
que vive e reina por sempre eternamente. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *Ser agradecidos é a ensinanza que hoxe nos amosa a Palavra de Deus.*

Na primeira lectura un estranxeiro de Siria sinte de corazón o agradecemento ao Deus. E promete manterse sempre á súa beira.

No evanxeo só unha de dez persoas que foron ben tratadas sinte a necesidade de dar as grazas polo ben que lle fan. Sexamos agradecidos.

PROCLAMACIÓN DA PALABRA RECOLLIDA NO LIBRO SEGUNDO DOS REIS

Baixou el Naaman o Sirio ao Xordán e mergullouse na súa auga sete veces, segundo lle mandara Eliseo o home de Deus. A súa carne tornouse entón coma a dun neno pequeno, e quedou limpo da súa lepra.

Volveu Naamán con toda a súa compañía onda o home de Deus e presentóuselle, dicindo:

- "Agora recoñezo que non hai deus en toda a terra, fóra do Deus de Israel. Acepta, pois, un regalo do teu servo".

Respondeulle Eliseo:

- "Polo Señor vivo a quen sirvo, que non aceptarei cousa ningunha". E por moito que lle insistiu para que aceptase, el negouse.

Naamán dixo entón:

- "Pois logo, permite que o teu servo leve unha carga desta terra, a que poidan cargar dúas mulas, pois o teu servo non ofrecerá holocaustos nin sacrificios a deus ningún, senón só ao Señor.

Palabra do Señor

🎵 *A túa palabra é o meirande ben* SALMO

PROCLAMACIÓN DO SANTO EVANXEO SEGUNDO LUCAS

Daquela, indo Xesús camiño de Xerusalén, mentres pasaba entre Samaría e Galilea, ao entrar nunha aldea, saíronlle ao paso dez gafos. Pararon ao lonxe, e dando voces suplicáronlle:

- Xesús, Mestre, ten dó de nós.

El, ao velos, díxolles:

- Ídevos presentar aos sacerdotes.

E aconteceu que cando ían para alá, quedaron limpos. E un deles, ao se decatar de que estaba curado, volveu louvando a Deus con grandes voces. E prostrándose, rostro en terra, aos pés de Xesús, deulle as grazas. Era un samaritano. Xesús dixo:

- Non foron dez os que quedaron limpos? Onde están os outros nove? Ninguén, fóra dun estranxeiro, volveu para lle dar gloria a Deus?

E engadiu:

- Érguete e vaite: salvoute a túa fe..

Palabra do Señor

(sentad@s) gardamos uns instantes de silencio para acoller a palabra no corazón



Todos somos agradados coa man que Xesús nos dá



pero só unha das dez persoas é agradecida

PROFESIÓN DA FE

Celebrante Despois de escoitar a Xesús no Evanxeo, queremos, Señor, ser agradecidos pola fe que compartimos e coa que queremos comprometernos.

♪ *Creo, Señor, pero aumenta a miña fe*

Monitor/a:

Crede en Deus,

o Pai que que ama a todos sen diferenza e que desexa de nós unha palabra de agradecemento?

Creo, Señor, pero aumenta a miña fe

Crede en Xesús Cristo, noso irmán,

que nos convida a compartir á súa beira e que desexa de nós palabras e feitos que amosen un corazón agradecido con todas as persoas que nos tratan ben?

Creo, Señor, pero aumenta a miña fe

Crede no Espírito Santo,

que nos alenta a dar unha man á beira de tantas persoas que viven sentíndose marxinadas e esquecidas?

Creo, Señor, pero aumenta a miña fe

Crede na Igrexa,

comunidade que necesita dar as grazas a todas e cada unha das persoas que o fan ben nas parroquias, mesmo sen esperar nada a cambio?

Creo, Señor, pero aumenta a miña fe

ORACIÓN UNIVERSAL

Celebrante: *Fiándonos de Xesús, ergamos a nosa voz ao Pai deixando que o corazón fale de todo o que lle agradecemos a el e aos demais, dicindo:*

Señor, agradecemos a fe que compartimos

Monitor/a

✓ Grazas, Señor, por querer unha Igrexa de comunidade, na que ninguén se sinta excluído, marxinado ou silenciado, oremos

✓ Grazas, Señor, polas nosas comunidades, nas que atopamos persoas que dan testemuño dunha fraternidade que salta fronteiras para coidar marxinados, pobres, maiores, parados, ... oremos

✓ Grazas, Señor, por todo aquilo que nos regalas: a vida, a saúde, a natureza, o traballo, os amigos, a familia... para que a nosa fe nos axude a saber descubrir aí a túa man xenerosa, oremos

✓ Grazas, Señor, por todas as persoas que senten dor de corazón ao ver aos refuxiados tirados, e non dubidan en ofrecer as súas mans acolledoras e tolerantes, oremos

✓ Grazas, Señor, por todos os esforzos a favor da paz, oremos

Celebrante: *Grazas, Señor, por escoitarnos, acollernos e axudarnos a vivir o evanxeo nas distintas situacións da vida. Por Cristo o noso Señor. Amén*

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Rezamos agora a oración de Xesús, a oración de irmáns, a oración agradecida e confiada ao Deus Pai que sempre nos agasalla na vida. Dicimos:*

NOSO PAI ...

SIGNO DA PAZ

Celebrante: *A fe sen feitos está morta, non leva a nada. Se a fe non é agradecida non produce feitos que a fagan viva. Compartamos a nosa fe agradecendo cos nosos irmáns un xesto de paz e de amor cos que están á nosa beira. Está nas nosas mans facelo mellor.*

 **nº 39** *Démonos todos a man*

COMUÑÓN

Celebrante: *Esta mesa, este altar é signo do compartir na vida. Participar hoxe é comprometerse para medrar no camiño da fe, porque seguir a Xesús esixe facer na nosa vida o evanxeo, e hoxe agradecemos ao Pai que nos convida a compartir este pan do Señor.*

Señor, eu non son merecente de que entres no meu fogar, mais unha palabra túa abonda para me salvar

 **nº 43** *Non vou só*

4.- AVISOS E DESPEDIDA

ORACIÓN FINAL

Celebrante:

Señor, a ti que nos alimentas
co Pan da Vida do teu Fillo,
queremos darche as grazas,
e tamén queremos agradecer
que nos teñas feito participar
da súa natureza divina.

Agradecemoscho a Ti que vives e reinas
por sempre eternamente. Amén

Ser agradecidos é de ben nacidos.

*Xesús sorprendeuse e doeuse de que os nove non
souberan dar as grazas polo favor recibido.*

*Que sempre saibamos nós agradecer a Deus a fe e a
vida que nos dá, e aos nosos irmáns o poder compartir
as nosas celebracións.*

Avísase das misas (ver folla do mes)

🎵 **nº 56** *Ide e pegoade*

*Que teñamos un bo día, unha boa semana,
e o Señor nos bendiga, † nos garde de todo mal
e nos leve ao seu fogar de vida eterna. Amén*



*Non é a felicidade
o que nos fai agradecidos.
E ser agradecidos
o que nos fai felices.*

Sé Agradecido

*“Só unha persoa volveu para darlle as grazas a Xesús”
“Onde están as outras nove”*

Palabras de Xesús no evanxeo de hoxe